




VOZNAN DI PUEBLO

"Bo ta kere den dunamento di pena di morto pa criminalnan?"



**Roberto Croes
Ambtenaar**

"Normalmente bo no a duna bida pa bo kita bida. Esaki ta ley di Dios. Apesar cu otro pais tin e ley aki, na Aruba nos mester castiga manera mester ta, no manera K.I.A ta awe (un motel). Corda riba e cashotnan na Willem III toren. Pone e hendenan aki traha, planta, capi cu cu y otro, pa nan pan di cada dia. Toca nos himno 6'or di mainta y 6'or di atardi unda tur hende tin cu para y respeta nos Aruba. Disciplina y respet!"



**Sharine Croes-Dubero
Ambtenaar**

"No. Pasobra cu e castigo ey bo no ta logra spanta otronan di comete e mesun crimen y pena di morto no ta un castigo. Si laga e criminalnan traha duro durante cu nan ta cera den prison, otronan los a cu prison no ta un hotel y tambe cu nan lo tin cu traha duro e resto di nan bida cu nan ta cera eyden. Si tog resulta cu e persona ta inocente, loke a yega di pasa den pasado, e persona ta na bida ainda pa haya su libertad. Den caso di pena di morto no".



**Adolph S. Croes
Ambtenaar**

"No. Pasobra e castigo aki tin e efecto cu e mester tin, esta di spanta e otronan di comete crimen. Si pone castigonan mas pisa, manera cadena perpetua combina cu trabao forza, p.e, coba canto di caminda, anto mi ta kere cu esey lo tin mehor efecto, pasobra nan lo tin verguenza di loke nan a haci y tur hende lo pasa wak ta traha duro. Castiga nan y no manda nan cu estadia den KIA of otro prison".



**Luis La Rosa
Negociante**

"No. Mi ta kere den un castigo pisa cu e delincuente sinti temor di husticia y cu nan ta sinti cu nan ta pagando pa nan mal hecho. Bida ta Dios so ta duna y kita, y ningun ser humano tin derecho riba e bida di su semehantenan. Impone pena di morto ta cay tambe den crimen, pero na un manera legal".



**Rafa de Cuba
Estilista**

"No. Mi no ta kere den pena di morto. Na Aruba, por ehemplo, esey no ta den e sentimento ni cultura di nos noble pueblo. Dios ta unico cu por dicidi riba bida di e ser humano y e gran mayoria di nos hendenan ta kere y ta respeta esaki. Na tur pais tin leynan pa castiga esnan cu ta haci delito. Nos tin e tambe na Aruba y loke mester haci ta aplica e leynan aki na un manera husto y basa riba pruebanan contundente".

© 1998 — Matutino DIARIO Aruba

Tin hopi tapmento di telefon andando awor aki?

ORANJESTAD (AAN): Diferente persona na Aruba, ta indica cu nan ta notando un 'sonido straño' constantemente na nan telefon, y nan ta kere cu kizas esaki ta indicacion cu Tapmento di Telefon ta tumando lugar?

Un ciudadano a splica cu el a tuma nota con un "klik-klik" ta sona mey-mey di su yamadanan, y e ta kere cu esey ta indicacion cu nan ta tap y of ta grabando su conversacion.

"Ta parce cu nan ta hopi amateur na Aruba pa tap telefon na e estilo bieu aki," e ciudadano a bisa. Ta tur hende ta haya sa asina ki ora tin tapmento andando.

E ta kere cu esnan cu ta haciendo e tap aki, ta hacie asina pura cu e abonadonan ta sinti mesora ki ora algo asina ta pasando. Hopi amateur mes!

